

四庫全書

集部

欽定四庫全書

集部

御定歷代題畫詩類卷

十九至
二十二

詳校官侍郎臣李封

主事銜臣徐以坤覆勘

總校官降調編修臣倉聖脉

校對官編修臣吳錫麒

謄錄監生臣黃恒謙

欽定四庫全書

御定歷代題畫詩類卷十九目錄

山水類

題高尚書秋山暮靄圖

元鄧文原

顧愷之秋江晴靄圖

元鄧文原二首

王維秋林晚岫圖

元鄧文原

題張絲所畫霜林雲岫圖

元鄧文原

題危太樸所藏榮陽鄭虔畫秋巖橫靄圖

元鄧文

原二首

顧愷之秋江晴嶂圖

元黃公望

李咸熙秋嵐凝翠圖

元黃公望

題關仝層巒秋霽圖

元黃公望

王維秋林晚岫圖

元黃公望二首

李咸熙山市霜楓圖

元黃公望

趙大年秋邨暮靄

元吳鎮

李咸熙秋嵐凝翠

元吳鎮

關仝秋山凝翠

元吳鎮

顧愷之秋江晴嶂

元吳鎮

右丞秋林晚岫

元吳鎮

張僧繇霜林雲岫

元吳鎮

秋江晚景圖

元劉秉忠

題高尚書秋山暮靄圖

元郭畧

關山秋霽圖

元王惲二首

江亭秋霽圖

元舒遜

題秋山晚眺圖

元吳澄

題高尚書秋山暮靄圖

元沈右

秋山暮靄圖

元柯九思

寫秋林遠岫圖

元倪瓚

雲峰秋霽圖

明藍仁

秋山曙色圖

明陶安

湖山秋霽圖

明鄭亮

一片秋意

明楊榮

題秋林泉石圖

明王裒

秋江晚眺圖十三韻

明陳政

江山秋暮圖

明蘇平

為唐池南題秋江遠眺圖

明楊慎

層巒秋景

明張寧

題方壺蒼山秋意圖

明呂復

題趙幹烟靄秋涉圖

明王世貞

題蘭湖秋色圖

明王世貞

秋水繫舟圖

元張庸

秋水繫舟圖

明廖道南

題紅葉扇頭

元王惲三首

題紅樹秋色

明董其昌

賦得千山紅樹圖

明楊慎

御定歷代題畫詩類卷十九目錄

欽定四庫全書

御定歷代題畫詩類卷十九

山水類

題高尚書秋山暮靄圖

元 鄧文原

傍溪草舍隔林中望際雲山翠幾重長憶雨餘閒信馬
輕鞭遙指兩三峰

顧愷之秋江晴靄圖

二首
有序

元 鄧文原

太樸危君所藏愷之妙卷誠希世物也出示索書不

勝歎羨為書短句以志喜云

晉室風裁推虎頭山川靈氣屬君收
指端幻出千重秀
并作江南一段秋

靜日攜筇溪水頭何如風景障圖收
與君相對坐不語
祇領千林萬壑秋

王維秋林晚岫圖

元
鄧文原

千峰凝翠宛神州中有仙翁寤寐遊
林麓漸看紅葉暮
風烟俄入野塘秋
搖搖小艇尋谿轉
寂寂雙扉向晚投

我欲探幽未能去畫中真境許誰儔

題張絲所畫霜林雲岫圖

元 鄧文原

慚余生也晚未能識君顏
宿秉川嶽氣時發胸臆
山澗壑自回互溪林若
縈環雲光映天色秋葉
舒錦斑室中有揚子向
晚啓玄關何如塵外慮
日夕相與還悠悠箇中
意未許落人寰

題危太樸所藏滎陽鄭虔畫秋巒橫靄圖

二首

元 鄧文原

金風瑟瑟入空山邨落人家葉盡斑
羨殺箇中奇絕處
一天烟靄有無間

鄭君胸次有江山應識區區只一斑
山色空濛斜日裏
鬱林遙指碧雲間

顧愷之秋江晴嶂圖

有序

元黃公望

顧長康天才馳譽在當時為謝安石知名其寓意於
畫離塵絕俗開百代繪事之宗至於癡亦由資稟之
高好奇耽僻不欲與世同故人有三絕之稱此卷墨

法入神傳采入妙莫得知其所以始而亦莫得知其所終變幻百出誠可謂聖於畫矣豈學知勉行者所得髣髴其一二哉一日太樸出示驚賞不已然亦不敢久羈敬書於後以復

三絕如君少斯圖更擅場設施無斧鑿點染自微茫山碧林光淨江清秋氣涼憐余瞻對久疑入白雲鄉

李咸熙秋嵐凝翠圖

元黃公望

山林之樂幽且閒何人卜居雲半間江亭負立蒼樹杪

招提高出碧溪灣，循溪隱隱穿細路。斷岸疎疎起烟霧，
微茫萬頃白鷗天。雁陳見羣落無數，樵歌初斷漁唱幽。
橋邊野老策杖留春山，萬疊西日下渺渺。一片江南秋
我昔荆溪問清隱，溪上分明如此景。別來時或狂夢思，
忽見此圖心為醒。李侯少年擅丹青，晚歲筆意含英靈。
興來漫寫秋山景，妙入毫末窮杳冥。無聲詩與有聲畫，
侯能兼之奪造化。臨牕點筆試題之，老眼模糊忘高下。

題闕仝層巒秋靄圖

有序

元

黃公望

闕全此卷雖祖洪谷子而間以王摩詰筆法融液秀潤正其中歲精進之作也人謂有出藍之美詎不信夫

羣峰巖巖暮雲連羅磴逶迤鳥道懸落葉深深門半掩
疎花歷歷客猶眠巖端飛瀑為青雨江上歸舟潏碧烟
應識箇中奇絕處昔年洪谷屬君傳

王維秋林晚岫圖

二首
有序

元
黃公望

王右丞生平畫卷所稱最者唯輞川雪溪捕魚等圖

耳吾意以為絕響不謂太樸於中州友人家又得此
卷而用筆之妙布置之神殆尤過焉固知右丞胸中
伎倆未易測識而千奇萬變時露於指腕間無窮播
弄豈非千載一人哉置之案頭臨摹數過終未能得
其髣髴漫書短句并識而歸之

羣山矗矗凝烟紫萬木蕭蕭向夕黃豈是邨翁戀秋色
故將輕舸下橫塘

秋嵐荏苒汎晴光處處邨邨帶夕陽一段深情誰得似

故知輞口味應長

李咸熙山市霜楓圖

元

黃公望

市散誰聞野鳥聲
短橋何處旅人行
莫嫌寂歷空山道
隔岸丹楓刺眼明

趙大年秋邨暮靄

元

吳鎮

曲磴平岡外遙峰落照沈
人家三徑僻烟樹幾邨深
漁唱流寒碧樵歌步夕陰
悠然懷舊侶山館散清音

李咸熙秋嵐凝翠

元

吳鎮

雨過秋光映翠微，巖雲一抹澹荆扉。
千山寂寂疎鐘杳，萬壑蕭蕭落木稀。
澗水奔飛行路濕，松篁迴合墅禽歸。
征帆點點滄江上，應羨山人種蕨薇。

關仝秋山凝翠

元吳鎮

絕壁孤亭迥千峰，落日曛沙明江上。
樹客帶洞前雲市，散雞鳴遠村荒犬吠。
聞一天秋色好多向此中分。

顧愷之秋江晴嶂

元吳鎮

從來六法重長康，染得新圖更鬱蒼。
萬頃遠橫秋鏡濶。

千重林立彩雲長
村村雞犬鳴晴晝
兩兩樵漁話夕陽
無限風烟誰得似
欲將此處付行藏

右丞秋林晚岫

元
吳鎮

右丞已往六百載
翰藻神工若个同
千嶂遠橫秋色裏
山家遙帶暮烟中

張僧繇霜林雲岫

元
吳鎮

六朝畫史知無幾
吳下僧繇獨擅場
百疊蒼巒浮障起
千林紺葉入雲長
低回野渡鐘聲遠
寂寞荒村樹影涼

咫尺披圖更蕭瑟短詞何敢遂揄揚

秋江晚景圖

元 劉秉忠

落筆縱橫不自休抹成小景絕清幽
碧波千里楚山晚紅葉一林荆樹秋
古渡任分南北岸長棹自送往來舟
十年閒事渾如昨對此依稀復舊遊

題高尚書秋山暮靄圖

元 郭界

遠樹含空烟羣峰緘積翠離離雁外檣
落日來天際高侯邱壑心點墨悟三昧
我欲畫滄洲畫長枕蓬睡

關山秋霽圖

二首

元王惲

望京樓上晚凭闌，長記居庸八月還。
一段紫烟吟不盡，枉分秋色與南山。

生平懷霽是初心，捲盡江山萬里陰。
十載夕佳亭上客，卷中還對玉千岑。

江亭秋霽圖

為黃友仁題

元舒遜

萬頃波光烟縹緲，風颭秋聲生木杪。
隔江髣髴是江南，一帶遠山青未了。
何人獨引小奚僮，來訪幽亭翫易翁。

亭下扁舟纜莫解磯頭昨夜多顛風

題秋山晚眺圖

元 吳澄

西風醉帽倚斜暉詩思山情萃一時一轉頭間無覓處
却尋舊畫要新詩

題高尚書秋山暮靄圖

元 沈石

高侯筆法妙天下貌得江南雨後山都是乾坤清淑氣
興來移入畫圖間

秋山暮靄圖

元 柯九思

三代以來推盛世九州之外有斯人君看筆底生秋色
盡在瀟湘楚水濱

寫秋林遠岫圖

贈約齋
因題

元倪瓚

五言韋刺史此地數曾遊無復綠陰靜空悲紅樹秋
聲晨浩浩雲影暮悠悠徵士沖襟勝邀余共茗甌

雲峰秋霽圖

為方
煥賦

明藍仁

茅屋溪頭紅樹村石梁秋水清無痕粉榆過雨鳥鳴澗
秔稻如雲山對門老翁日高睡未起穉子讀書牕戶裏

干戈如此賦斂煩雞犬晏然鄉曲喜山中酒熟黃花開
仙人候我芙蓉臺雲林今夜好明月擬跨幔亭黃鶴來
武夷山水天下無層巒疊嶂皆畫圖山川直疑渾沌鑿
秦漢而下靈仙都中天積翠開宮殿石壁紅光夜如電
鸞鳳常驂神姥遊猿猴共醉曾孫宴洞中別有昇真天
瓊林遺脫如枯蟬露盤仙掌千年藥春水桃花九曲船
萬松岡頭羽衣客更入三山採真訣神游不計海天遙
夢覺長懷海天白歸來高隱萬年宮天香時降雙青童

道參元始鴻濛外身寄虛空象緯中嗟余久慕烟霞侶
天遣空山作詩苦清歌曾遶幔亭雲凍筆空題草堂雨
金丹擬就玉蟾分木葉西風鐵笛聞野老只知堯舜世
樵夫或遇武夷君

秋山曙色圖

明 陶安

樹含曉色護林巒重露如嵐滴翠寒猿鳥儘逢山叟慣
未嘗驚怪竹皮冠

湖山秋霽圖

圖有鴻雁烏鴉
竹木為太守作

明 鄭亮

太湖激濫浮晴玉蘆荻河洲秋藪藪懸崖翠律黛娥森
羣雁盤翔下平陸瑤天捲雲碧於鏡山空水閣橫秋影
玉筆峰前鐵畫書白榆川上金蛇陣哀鴻冥冥破昏碧
寒聲帶暝相呼急蘭室銀缸融冷光佳人半掩羅襦泣
小奴有警相依眠野人增綴令悄然夢迴胡塞三更月
魂逐衡陽萬里天栖栖有恨誰教省啄者自啄飲者飲
南國原田菰米稀洞庭渚澤烟波冷學淵老仙鶴骨清
修筠落木多秋情夕陽樹杪散餘綺歸鳥欲宿啞啞鳴

爾鳥已托一枝安征鴻暫喜平柯寬明日飛騫九達上
請看儀羽天朝端

一片秋意

為史院
部題

明楊榮

昨夜西風起蘋末長林蕭蕭葉初脫夕陽流水澹無波
玻瓈沉浸青冥闊斷隄古岸遙相連髣髴疑是鏡湖邊
黃花未發含清露白鳥欲渡橫蒼烟人間此景何瀟灑
獨對新圖意閒雅安得扁舟泛綠漪坐看翩翩海鷗下

題秋林泉石圖

明王裒

高林頗深邃遠洲亦縈紆風景亦何異中有隱者廬陽
崖落日明陰磳浮雲虛耕野見秋火扣舷聞夜漁竭來
塵網中機務日相拘念茲膏肓疾媿彼泉石圖抱拙謝
簪黻養素宜琴書俯仰天宇寬所樂恒有餘

秋江晚眺圖十三韻

明 陳政

看君圖畫裏秋意浩無窮水遠天涵碧林疎霞映紅懸
蘿低拂石古木上撐空顥氣初過雨晴嵐不動風舟閒
依草薄亭寂闕榛叢僧寺浮雲外人家落照中翠稀零

岸葦丹密變江楓遠字聯寒雁危橋隱暮虹地蟠山矗
矗天杳樹濛濛眺遠秋容澹尋幽野興濃乍疑牛渚客
又似鹿門翁咫尺窮佳致尋常見化工金陵秋色晚風
景宛然同

江山秋暮圖

明
蘇平

江鄉風物遠依微雲樹離離帶夕暉黃葉亂隨流水去
青山遙映白鷗飛一聲牧笛和烟暝幾處漁舟載月歸
有客年來簪組繫漫勞清夢想柴扉

為唐池南題秋江遠眺圖

明 楊慎

秋空沈寥秋影闊魚尾霞收雲一抹千崖有靄風落山
萬壑無聲水歸木槎枒老木挐蚪龍梭槭平林叫鶻鵒
不聞金籟似竽鳴但見翠微如黛潑壑堵僧睇迴不昏
略約樵行危易怛一灣赤燒楓人明萬壑黃雲稻孫割
尋穴玄駒迷東西卜樹烏鴉相叫聒詞客頻將技癢搔
畫工欲把天機奪老倦捫蘿與攀葛倚闌獨把吟髭捋
遙岑寸碧天杵倚遠目雙明海月掇開尊披圖興不淺

烏絲欄界玄霜沫為君走筆賦新詩却笑蕭郎擊銅鉢

層巒秋霽

為諸立夫題

明張寧

秋風吹雲秋雨晴羣山滌翠羣峰明天光下際澤氣隱
一碧萬仞青螺橫山高石峻無靡草桂館蘭房淨如埽
振谷天球練瀑飛障林霜錦丹楓繞采蘋誰泛小蘭舟
急水迴塘不自由雲端笙鶴來何晚澗底荊薪人白頭

題方壺蒼山秋意圖

明呂復

昔遊華蓋仙人掌萬疊芙蓉紫翠生猶記月明聞鐵笛

人間無處著秋聲

題趙幹烟靄秋涉圖

明

王世貞

澹靄徐分遠近山一溪新漲碧灣環
行人不道褰裳苦却似清沂出浴還

題蘭湖秋色圖

送王吏部

明

王世貞

秋浦木蘭槭青雲鵷鷺行時人歸簡
要循吏有輝光水鏡元同澈露桃難共
芳芙蓉池上客誰不向王郎

秋水繫舟圖

元

張庸

小姑山到彭郎磯老樹含風霜葉飛何人泊舟秋色裏
釣得鱸魚三尺肥

秋水繫舟圖

明
廖道南

松風萬壑水千尺獨有幽人開草亭遠溪花竹弄秋月
傍岸菰蒲狎客星虛閣陰森青石嶂孤舟澹蕩白雲汀
濟川應待築巖叟故遣畫工圖爾形

題紅葉扇頭

三首

明
王惲

故宮秋色醉來鮮
浥露吟風雜暮蟬
折得不浮流水去

一枝留伴月中仙

深宮不禁水東流
賦就幽情孰與酬
紅露滿山秋正好
等閒休上建章樓

今年火盛若為攻
盼盼西風一掃空
忽見扇頭紅錦色
上陽秋意滿吳宮

題紅樹秋色

明
董其昌

山居幽賞入秋多
處處丹楓映黛螺
欲寫江南好風景
雲川一派出維摩

賦得千山紅樹圖

送楊茂之

明楊慎

蕭郎雅工金碧畫
愛畫碧雞與金馬
畫作千山紅樹圖
行色秋光兩瀟灑
搖落深知宋玉悲
登山臨水送將歸
丹林初曉清霜重
紫谷斜陽赤燒微
故人辭我故鄉去
滇樹遙遙接巴樹
桑落他山共醉時
楓香客路銷魂處
白首遐荒老未還
流波落木慘離顏
錦城紅濕那能見
千里隨君夢裏攀

御定歷代題畫詩類卷十九

欽定四庫全書

御定歷代題畫詩類卷二十目錄

山水類

題柴言冬景山水

宋陸游

冬景山水

明張以寧

題山水冬景

明貝瓊

冬景

明金幼孜

為吏部師尚書題冬景

明金幼孜

題冬景畫

明解縉

題冬景山水

明黃仲昭

山水圖冬景

明商輅

題李思訓寒江晚山圖

元鄧文原

寒汀小景圖

元李孝光

寒邨雪暮圖

元吳師道

題唐希雅畫寒江圖

宋陳與義

高房山寒江孤島圖

明王行

倣李營邱寒山圖

明董其昌

題王摩詰畫寒林

宋范純仁

許道寧寒林

宋文同

題鄧國材水墨寒林

宋楊萬里

寒林圖

金元德明

李成寒林圖

元吳鎮

李成寒林圖

元黃公望

題寒林圖

明劉基

題董源寒林重汀圖

明貝瓊

題寒林遠岫圖

明烏斯道

題達實特穆爾大夫所藏王維畫寒林曉行圖

元

蒲道源

題趙團練江干曉景

宋秦觀四首

題雲林晴曉圖

元陳旅

題米敷文煙巖曉景

明錢用壬

雲山晚景圖

元劉因

江天暮景圖

元程鉅夫

畫江天晚色

元倪瓚

誠道原溪山晚霽圖

元釋祖柏

江山晚眺圖

明高啓

暮江圖

明湯顯祖

高尚書夜山圖

元鮮于樞

題高尚書夜山圖

元鄧大原

為蔣英仲作顏輝畫青山夜行圖歌

元柳貫

欽定四庫全書

御定歷代題畫詩類
卷二十目錄

題高尚書夜山圖 元吳全節

夜山圖 元高克恭

高尚書夜山圖 元趙孟頫

高尚書夜山圖 元虞集

夜山小景 明盛萬年

夜景 明文彭

題山水夜景 明姚濬

御定歷代題畫詩類卷二十目錄

欽定四庫全書

御定歷代題畫詩類卷二十

山水類

題柴言冬景山水

宋陸游

草亭臨峭絕，霜嶂起嶙峋。危磴儻可上，老夫思卜鄰。

冬景山水

明張以寧

寒月白千峰，林深路絕蹤。遙知僧定起，疎響在高松。亦欲剡溪去，其如山海重。

題山水冬景

明 貝瓊

天雲漠漠四野低
大山小山玉筍齊
春還何處尋消息
花發枝南與枝北

冬景

明 金幼孜

萬里平鋪雪滿天
瑤花亂點散瓊田
江邨盡日無啼鳥
惟見沙頭繫釣船

為吏部師尚書題冬景

明 金幼孜

曲曲溪流凍不聲
扁舟獨載更多情
千峰玉樹凌寒色

九疊銀屏照晚晴

明解縉

題冬景畫

冬嶺森瑤林積雪縞絕壁天空失孤鳥萬境喧一寂歎
此行路人旅騎猶歷歷高居者誰氏綸巾坐方適

題冬景山水

明黃仲昭

夜來積雪深曉覺寒威逼呼童棹扁舟蕩漾安所適隔
溪有寒梅欲訪春消息

山水圖冬景

明商輅

同雲黯黯雪漫山繫却扁舟傍水灣被擁蘆花酣睡後
不知身世在人寰

題李思訓寒江晚山圖

元 鄧文原

李唐王孫重豪素愛寫寒江千萬樹上有蓬萊五色雲
下有仙家幾庭戶清霜點作秋滿林咫尺瑤牕起烟霧
西風吹動晚山蒼歸舟掩映猶堪數迢迢錦水汎雙鳬
漠漠青天飛雪鷺人間畫手非不多誰似李侯得真趣
李侯宿世列仙儔更有何人同出處徽廟題來字字真

把玩殷勤迺奇遇斯圖斯景世莫傳古汴荒涼風景暮
眼中人事已非前畫裏山川尚如故老我披圖一愴然
落日長歌漫為賦

寒汀小景圖

為去疾
監丞作

元
李孝光

秋氣向黃落小雨收虹霓繚繚澍浦間水乾見塗泥蘆
人往何處艇子亂鳬鷺飛鴻惡見欺決起無東西江水
動落日羣飛終不迷豈無稻梁願湖海尚擇栖冥冥一
高舉不知弋與弔感此三太息北風吹草低

寒邨雪暮圖

元 吳師道

木杪棲鴉景已殘，沙邊落雁雪猶寒。
江南江北曾行路，今日山牕借畫看。

題唐希雅畫寒江圖

宋 陳與義

江頭雲黃天醞雪，樹枝慘慘凍欲折。
耐寒野鴨不知歸，猶向沙邊弄羽衣。
黃茅終日不自力，影亂弱藻相因依。
惟有蒼石如臥虎，不受陰晴與寒暑。
舟中過客莫敢言，閒伴長江了今古。

高房山寒江孤島圖

明王行

千山萬山重複重烟嵐草樹深莫窮高堂大軸示寬廣
要以筆力誇奇雄青紅蒼翠滿縑素缺處殘碧分遙峰
雖云眼底供一快未見闊遠開心胸歷觀畫史每如是
意謂此法由來同昨嘗凌秋湍揚子一舸縹緲乘長風
洪波吞天渺無際出沒但有孤輪紅中冷盤陀瞬息過
回首浮玉雲濤中乃知山水有佳處到此始覺飛埃空
當時海嶽應飽見落墨便自超凡庸不將層疊競工巧

遂使氣象齊鴻濛平生愛畫惟愛此苦恨妙法無能攻
九州之表有人物意匠髣髴宗南宮莫言未入米家興
百年猶數房山翁茲圖咫尺便千里生綃數幅徒為功
亦知盤礴意有在正欲逐米追高蹤愛之歌詠乃常理
好事況有天隨宗同觀何人江海客氣似貫月書艸虹
文辭瀾翻沛難禦奔走風雨驅豐隆古稱珠玉在我側
濡翰自愧言非工黃塵城郭久見困何能閒靜能相容
詩成忽復三歎息矯首長望青冥鴻

倣李營邱寒山圖

有序

明
董其昌

余自弱冠好寫元人山水金門多暇夢想家山益習
之憶顧益卿開府遼陽以兩策求畫一為益卿一為
山人王承父余畫承父而返益卿扇報章云左相宣
威沙漠右相馳譽丹青皆非吾輩第一義俟歸山以
相怡悅耳蓋簪裾馬上君子未嘗得余一筆而余結
念泉石薄於宦情則得畫道之助陶隱居云若不為
無益之事何以悅有涯之生千古同情惟余獨信非

可向俗人道也。今年春有朝貴疏余，雅善盤礴，致塵
天聽。余聞之，亟令侍者剪吳綃，縱廣丈許，磨礮糜瀋
秉燭寫。李成寒山圖，經宿而就。遂題此詩以洗本朝
士大夫俗。夫韓滉、燕肅、宋復古、蘇子瞻皆善畫，朝貴
腹中無古今，固應不知。第以為罪案，但可曰不能遣
余習偶。被時人知，如摩詰語耳。視此曹求田問舍殺
人媚人，一生作惡業者，何啻梟鳳而妄下語，乃爾邪。
世必有能知者，余亦何以為意。

拈筆經營輞口居心知餘習未全除莫將枕漱閒家具
又入山中篋裏書

題王摩詰畫寒林

宋 范純仁

摩詰傳遺跡家藏久自竒高人不復見絕藝更誰師水
石生寒早烟雲結雨遲筆端窮造化聊可敵君詩

許道寧寒林

宋 文同

許生雖學李營邱墨路縱橫多自出交柯揮霍裴旻劍
亂蔓淋漓張曉筆

題鄧國材水墨寒林

宋 楊萬里

人間那得箇山川船上漁郎便是仙
遠嶺外頭江盡處問渠何許洞中天

寒林圖

為侯子晉賦

金 元德明

川光茫茫風景暮一雪無情天地素
長安閉門千萬家亦有行人蹋長路
新豐烟火灞橋水畫史工作荒寒趣
雪中故事知幾何偏識詩翁認寒處
君不見淮西城下鷺鶴鳴官軍夜斫
吳家營只如黨家粗俗亦不惡銀燭

金荷天未明拈出雪詩三十韻寒驢席帽可憐生

李成寒林圖

元 吳鎮

嶺高霜自結風勁入寒時日落晚山碧林空流水悲棲
鴉尋樹早瘦蹇下岡遲無限黃塵滿幽棲總不知

李成寒林圖

元 黃公望

六法從來推顧陸一生今始見營邱腕中筋骨元來鐵
世上江山盡入眸林影有風摧落葉澗聲無雨咽清流
寒驢騷客吟成未萬壑寒雲為爾留

題寒林圖

明 劉基

搖落江邊秋樹林淒涼久客二毛侵
藤蘿歲晚龍蛇死
叢薄天寒虎豹深
流水斜陽人遠近
青烟白草雁飛沈
桂花自在山中發
悵望西風起夕陰

題董源寒林重汀圖

明 貝瓊

天下畫師無董源
學者紛紛工水石
雲山萬里出巴陵
白首淮南見真蹟
亂石平坡淨無土
松根裂石蟠龍虎
偃蓋千年飽雪霜
林深六月藏風雨
江上邨墟何處入

浮空遠黛蛾眉溼漁人日暮各已歸小舟如鳬落潮急
我昔西清常看畫南唐此本千金價坐移絕境在雲間
月出霜猿啼後夜薄游未挂吳淞帆令我一夕思江南
安得買田築室幽絕境開牕日日分晴嵐

題寒林遠岫圖

明 烏斯道

游子念故山歲晏不得歸出門見林薄日暮烟火微闌
河渺千里猿狖聲正悲況爾霜雪繁鳥道不可躋陽春
固伊邇奈此寒無衣衣寒何足歎所憂美人違

題達實特穆爾大夫所藏王維畫寒林曉行圖

元 蒲道源

野景荒寒霜意邊疎林僵立勢參天
定應畫妙王摩詰故著詩清益浩然
驢怯小橋鞭不動風掀危帽整還偏
官閒老我叨君賜紅日三竿尚晝眠

題趙團練江干曉景

四首

宋 秦觀

本自江湖客宦遊常苦心看君小平遠
懷我舊登臨鳥外雲峰晚沙頭草樹晴
想初揮灑就侍女一齊驚

公子歌鐘裏何從識渺茫惟應斗帳夢曾到水雲鄉
曉浦烟籠樹春江水拍空煩君添小艇畫我作漁翁

題雲林晴曉圖

元陳旅

故人別後江波綠神女歸來峽雨乾海上日花春冉冉
天邊雲樹曉團團滿汀芳草留孤艇度石幽泉咽下灘
最愛東頭小亭子聽鶯何日一憑闌

題米敷文烟密曉景

明錢用壬

江上亂峰生暮烟隔江遙望水雲連西風戰艦今無數

不見米家書畫船

雲山晚景圖

元 劉 因

天機濃淡出巖姿
夢境風雲入壯思
畫裏青山照白髮
行藏渾似倚樓時

江天暮景圖

元 程鉅夫

昏鴉零亂掩荆扉
烟樹微茫水四圍
我願卜隣還要否
門前恰有釣魚磯

畫江天晚色

贈志學

元 倪 瓚

不見呂君久題詩懷不忘風聲淅落葉山影半斜陽獨
鶴來遲暮孤帆出渺茫為圖秋色去留寄讀書堂

誠道原溪山晚霽圖

元

釋祖柏

微雨過溪上青山草閣前牛羊知返徑童穉喜歸船烟
樹邛邛鳥春泉處處田披圖憶芝阜頭白尚安眠

江山晚眺圖

明

高啓

一髮青山斷雁邊渚宮樓閣暮雲連烟波髣髴江南意
風柳依稀峽外天釣艇歸時風動葦僧鐘起處日沉烟

觀圖忽起滄洲想身墮黃塵又幾年

暮江圖

明
湯顯祖

風起煙霏林翠開暮帆秋色半江迴疎燈獨照歸鴻急
長似瀟湘夜雨來

高尚書夜山圖

元
鮮于樞

世人看山在山下李侯看山向絕頂世人畫山畫白日
李侯畫山暮夜景絕頂看山山更奇夜景摹出人少知
遠山蒼蒼近山黑巖樹厯厯汀樹微天高露下暮潮息

月明一片寒江遲藏深樂淵潛驚定安林棲耳絕城市
喧心息聲利機古人無因駐清景高侯有筆能奪移容
翁復作有聲畫冥搜天巧為補遺後來知有李侯之德
高侯畫千年人誦容翁詩

題高尚書夜山圖

元 鄧文原

吳山面滄江中秋氣颯爽樓居謫仙後公退謝塵鞅孤
月出海上高懷一俯仰佳哉高侯畫得意超象罔我來
秋向晚月色寒莽蒼山遠落木淨風高怒濤響奔騰萬

雲氣忽駕蒼蚪上平湖雨翻江渺渺波蕩漿回思圖畫
時歲月倏已往山川更晦明陰陽遞消長人生何獨勞
局促老穹壤我將乘倒景千載縱清賞松喬遺世人一
笑凌烟像

為蔣英仲作顏輝畫青山夜行圖歌

元
柳貫

前山濕霧方濡濡後山蒸雲如鬼驅松蹊行盡迫暝黑
壁月正挂寒蟾蜍問翁蒼茫何所適投館莫有林間廬

枯梢尚鳴風勢急隈岸欲渡溪流飈沃州天姥雖峭絕
無此原壑深盤紆固應豐城牛斗墟龍劍夜出乘飛符
神人仗氣挾以俱虎豹旁躑雄牙須世間何物珊瑚株
不可褻翫矧可誣青峰之巔野水碓獨往似是仙者徒
心融意定不少假收攬竒怪一筆摹蔣君閒朝攜過余
墨色照几晴光鋪老顏未老為此圖柳子歌罷三嗚呼
南州雙壁范與虞君當請賦傾明珠

題高尚書夜山圖

元
吳全節

高李風流仕西浙共倚危樓望吳越吳越江山千萬里
高侯畫對中秋月生紙經營入董源朦朧烟樹迷宮闕
玉露沈沈四次寥潮聲已息簫聲咽不寫思陵全盛時
空遺白堦堪愁絕君不見王子猷亦向山陰弄雪舟誰
拈秃筆埽清遊古今佳致總悠悠

夜山圖

元
高克恭

萬松嶺畔中秋夜況是樓居最上方一片江山果奇絕
却看明月似尋常

高尚書夜山圖

元趙孟頫

高侯胸中有秋月能照山川盡豪髮戲拈小筆寫微茫
咫尺分明見吳越樓中美人列仙臞愛之自言天下無
西牕雨暗政愁絕燈前還作夜山圖

高尚書夜山圖

元虞集

吳越蒼茫咫尺間尚書能畫夜看山塵銷海市露初下
雪積江山潮始還坐上賦詩誰絕唱夢中化鶴或臨關
高情久逐年華盡秋樹寒波愧妙顏

夜山小景

明 盛萬年

月明萬象俱空人靜諸峰欲動
忽忽斷却塵緣寂寂喚
回幽夢

夜景

明 文彭

柴門月色最清宜寫出詩情杜拾遺
一片林巒深窅渺
不分明處更離奇

題山水夜景

明 姚澹

遠峰纖月關雙彎橋下寒流響珮環
多恐一天清露重

不教神女戀人間

御定歷代題畫詩類卷二十

欽定四庫全書

御定歷代題畫詩類卷二十一目錄

山水類

郭熙畫秋山平遠

宋蘇軾

次韻子瞻題郭熙畫秋山平遠

宋黃庭堅

郭熙秋山平遠用東坡韻

宋樓鑰

郭熙秋山平遠

宋蘇軾二首

次韻子瞻題郭熙平遠

宋蘇轍二首

題工部文侍郎周翰郭熙秋山平遠

宋晁補之
二首

題遠山平林圖

宋王炎

題姪孫豈潛家平遠圖

宋戴復古

豈潛弟平遠圖

宋戴曷

梁忠信平遠山水

金劉迎

秋山平遠圖

元劉因

趙令穰秋邨平遠圖

元鄧文原

江貫道江山平遠圖

元虞集

題江貫道平遠圖

元鄭東

題賈治安同知秋林平遠圖

元錢惟善

題吳仲圭平遠圖

明鮑恂

題夏圭溪山清遠圖

明陳川

題自畫秋林平遠

明張宇初

題陳秀才溪山佳趣

元戴表元

題玉巖上人溪山野趣圖

元成廷珪二首

雲山清趣圖

明丘濬

湖山佳趣圖

明陳仲完

湖山佳趣卷

明李昌祺

江山遠趣圖

明周敘

題方用方林塘幽趣圖

明鄭闢

題湖南清絕圖

宋韓駒

洪武丁丑春題王叔明湖山清曉圖

明莫士安

題王叔明湖山清曉圖

明王世貞

巨然山寺

金任詢

題巨然山寺圖

元虞集

燕文貴秋山蕭寺圖

元鮑恂

燕文貴秋山蕭寺圖

元陸廣

燕文貴秋山蕭寺圖

元高遜志

燕文貴秋山蕭寺圖

元俞復

燕文貴秋山蕭寺圖

元倪瓚

題燕文貴秋山蕭寺圖

明黃守

方方壺松巖蕭寺圖

元鄧文原

方壺松巖蕭寺

元吳鎮

方方壺松巖蕭寺圖

元黃公望

題香山寺畫卷

元王惲

題秋林煙寺圖

元陳旅

費景祥索題徐幼文寫蕭山古寺圖

明張羽

煙寺晚鐘圖

元吳師道

煙寺晚鐘圖

明謝士元

集句題山邨圖

元馬臻二首

題江邨圖

元杜本

水邨圖

明鄧楠

水邨圖

明顧天祥

水邨圖

明沈周

題董元溪岸圖

元趙孟頫

錢舜舉溪岸圖

明張羽

蒼崖遠渚圖

元元好問二首

題梅道人平林野水圖

元鄭洪

水光林影圖

元丁鶴年

為王希曾題溪南長蕩圖

明吳寬

為楊簡齋題空濛圖

元馬臻

題陳直卿一碧萬頃

元朱德潤

為馬仲禎題一灣煙水

明僧麟洲

次韻趙僉為趙宰畫野水多於地春山半是雲蓋

宰之尊公詩也

宋方岳

江流天地外山色有無中

明魏時敏

題友雲水墨畫以唐人不雨山長潤無雲水自陰
為畫景遂次其韻題之

明陳顥

御定歷代題畫詩類卷二十一 目錄

欽定四庫全書

御定歷代題畫詩類卷二十一

山水類

郭熙畫秋山平遠

宋 蘇軾

玉堂畫掩春日閒中有郭熙畫春山鳴鳩乳燕初睡起
白波青嶂非人間離離短幅開平遠漠漠疎林寄秋晚
却似江南送客時中流回頭望雲巘伊川佚老鬢如霜
臥看秋山思洛陽為君紙尾作行草炯如嵩洛浮秋光

我從公遊如一日不覺青山映黃髮為畫龍門八節灘
待向伊川買泉石

次韻子瞻題郭熙畫秋山平遠

宋黃庭堅

黃州逐客未賜環江南江北飽看山玉堂卧對郭熙畫
發興已在青林間郭熙官畫但荒遠短紙曲折開秋晚
江邛煙外雨脚明歸鴈行邊餘疊巘坐思黃柑洞庭霜
恨身不如鴈隨陽熙今頭白有眼力尚能弄筆映牕光
畫取江南好風日憇此將老鏡中髮但熙肯畫寬作程

五日十日一水石

郭熙秋山平遠用東坡韻

宋樓鑰

槐花忙過舉子閒舊遊憶在夷門山玉堂會見郭熙畫
拂拭縑素塵埃間楚天極目江天遠楓林渡頭秋思晚
煙中一葉認扁舟雨外數峰橫翠巘淮安客宦踰三霜
雲夢澤連襄漢陽平生獨不見寫本慣飲山綠餐湖光
老來思歸真日日夢想林泉對華髮丹青安得此一流
畫我橫筇水中石

郭熙秋山平遠

二首

宋
蘇軾

目盡孤鴻落照邊
遙知風雨不同川
此間有句無人識
送與襄陽孟浩然

木落騷人已怨秋
不堪平遠發詩愁
要看萬壑爭流處
他日終煩顧虎頭

次韻子瞻題郭熙平遠

二首

宋
蘇轍

亂山無盡水無邊
田舍漁家共一川
行遍江南識天巧
臨牕開卷兩茫然

斷雲斜日不勝秋付與騷人滿目愁父老如今亦才思
一蓑風雨釣槎頭

題工部文侍郎周翰郭熙秋山平遠

二首

宋晁補之

漁邨半落楚江邊林外秋原雨外川誰倚竹樓邀大舫
天涯暮色已蒼然

洞庭木落萬波秋說與南人亦自愁欲指吳松何處是
一行征鴈海山頭

題遠山平林圖

宋 王 炎

山色微茫疑有無
木葉半脫殊蕭疎
雲根更著數椽屋
此屋當有幽人居
墨妙逼真乃如此
畢竟非真惟近似
何如屐齒飽經行
是處溪山皆畫笥
還君圖畫我且歸
家在江南依翠微

題姪孫豈潛家平遠圖

宋 戴復古

好山橫遠碧
平野帶林塘
四望耕桑地
幾年雲水鄉
海天龍上下
秋日鶴翱翔
觀物忽有感
無心住草堂

豈潛弟平遠圖

宋戴昺

卜築占寬閒，修篁老樹間。
八牕開宇宙，一室貯雲山。
野曠行人少，天遙去鳥還。
悠然會心處，妙語徹玄關。

梁忠信平遠山水

金劉迎

憶昔西游大梁苑，玉堂門閉花陰晚。
壁間曾見郭熙畫，江南秋山小平遠。
別來南北今十年，塵埃極目不見山。
烏韉席帽動千里，只慣馬蹄車轍間。
明牕短幅來何處，亂點依稀澹寒具。
煥然神明頓還我，似向白玉堂中住。

濛濛煙靄樹老蒼上方樓閣山夕陽一千頃碧照秋色
三十六峰凝曉光懸崖高居誰氏宅縹緲危欄蔭青樾
定知枕石高臥人常笑騎驢遠遊客當時畫史安定梁
想見泉石成膏肓獨將妙意寄毫楮我愧甫立隨諸郎
此行真成幾州錯區區世路風波惡還家特作發願文
伴我山中老猿鶴

秋山平遠圖

元 劉 因

南山千古一悠然誤落關全筆意邊急著新詩欲收領

已從慘淡失天全

趙令穰秋邨平遠圖

元 鄧文原

白沙翠竹映江皋，幾處邨居對寂寥。
水落漁梁人暗度，霜清曲渚荇初銷。
千山雜沓凝嵐紫，萬木蕭森向晚彫。
自是秋光無限好，誰知點染付輕綃。

江貫道江山平遠圖

元 虞 集

江參去世二百年，翰墨零落多無傳。
人間幾人寫山水，誰能意在揮毫前。
昨見石林舊家物，春雷疊嶂初破墨。

我和葉詩頗豪放三者相望都突兀險危易好平遠難
如此千里數尺間高雲舒卷非散地麗日照耀皆名山
我持美脯酒一斗墨汁盈盤可濡首江生精神作此山
向山呼生當至否高秋銀漢天無雲惟中冷然來夜分
黃茅嶺頭華蓋頂畫我獨訪浮丘君

題江貫道平遠圖

元鄭東

飛鳥欲沒暮煙稠落落人家竹樹秋絕似南徐城上望
蒼茫野色入揚州

題賈治安同知秋林平遠圖

元 錢惟善

軒蓋昂昂五丈夫，傲然下睨石於菟。
扁舟人似青山瘦，折簡從來不可呼。

題吳仲圭平遠圖

明 鮑恂

蒼山遙遙幾千里，綠樹參差碧煙起。
雙帆忽從江上歸，影落斜陽濕秋水。
林陰蒼莽鳥不飛，石徑踳蹬行人稀。
松根似可縛茆屋，沙尾亦足容漁磯。
我嘗西遊倚江閣，極目長空入寥廓。
好山不肯過江來，恨不乘風跨黃鶴。

吳君畫手當代無落筆何年成此圖安得著我巖壑底
相覓老樵尋釣徒

題夏圭溪山清遠圖

明
陳川

我家東南丘壑好曲折雲林護危杪澗沙流水春自香
石楠碎葉秋如掃縛柴野橋松雨涼鳴鐘破寺茶煙杳
山椒茅亭如笠大石脚漁舟似瓢小人家制度太古前
雞犬比鄰往還少酒杯吹香小店門落日漁樵多醉倒
六年不歸長夢見白髮忘情負魚鳥晴牕見畫三摩挲

舊夢微茫今了了不知何處得此圖覺我山居殊草草
安得溪南寫石田便攜妻子從茲老

題自畫秋林平遠

明 張宇初

北苑高情宿世同疎林汀渚正秋風硯池灑墨應多思
寫向寒煙夕照中

題陳秀才溪山佳趣

元 戴表元

城郭尋尋盡溪山宛宛來同誰遷蠟屐為子破莓苔書
欲爛斑設花須爛漫開趙郎題墨妙煙霧眼中開

題玉巖上人溪山野趣圖

元 成廷珪

流水淙淙石齒齒滿庭雲氣欲模糊白鷗溪上秋多少

黃葉山中路

一作徑

有無十月雨深漁屋破三江風急野

航孤年來難覓幽居處空向晴牕看畫圖

題玉巖上人溪山野趣圖

元 成廷珪

秀州城西春事微二月苦雨行人稀江湖渺然不可渡
風雨如此將安歸老來口腹胡為累亂後人民今見非
兼旬不得武陵信倚杖南望孤鴻一作雲飛

雲山清趣圖

為歐陽
道人作

明

丘濬

山矗矗雲漫漫雲容山色微茫間一天澹月秋空靜滿
地落花春雨寒道人愛此有清趣穿雲結屋依山住一
縷茶煙午夢餘兩腋清風欲飛去欲飛不飛無限情拂
絃時作太古聲驚猿叫月淚潛墮老鶴知更相和鳴夜
深萬境俱岑寂兀然虛室生寒白回頭人世隔紅塵雲
山慘澹無顏色

湖山佳趣圖

明

陳仲完

金史四八
卷二十一
微雨息市氛晴光溢水木暫輟童冠書少豁林泉目
哉南北峰影浸西湖綠嶺外號長松霞邊起孤鶩荷香
隱綵舟鳥鳴迓絲竹興並坡老遊吟步逋仙躅落日度
寒鐘悠然自天竺

湖山佳趣卷

明
李昌祺

宦遊愜深好乃在名勝區山水自足適况茲職文儒橫
經有餘閒逍遙出通衢春服各已成遂與童冠俱徘徊
恣言笑登陟忘飢飭晴鳶戾層空弱藻翻文魚至理與

景會天機獨吾娛悠悠仰川上眷眷懷舞雩詠歌返覺
舍高興誰能踰

江山遠趣圖

為襄城伯賦

明周敘

長天極浦波溶溶巖巒秀沓青芙蓉生綃半幅圖遠趣
髣髴江山千萬重近郭名園不知處樓觀依微出深樹
細雨孤帆島外舟殘煙列騎花間路飛流百丈晴虹懸
危梁倒影丹崖巔樵徑多逢采芝客石林靜隱看棋仙
層層閣道雲連棧渺渺隄沙落歸鴈劒門天闢窮勝遊

湘水秋高縱青盼我公心事非等閒
豈必娛情圖畫間
意氣遙凌蔥嶺道
聲光直動燕然山
河清海晏昇平日
移鎮南都今第一
丹青好寫麟閣容
頌功更有如椽筆

題方用方林塘幽趣圖

明鄭關

何處發清興林塘橫絕標
羨君林塘有幽趣為君醉作
林塘謠我為林塘吟
爾得林塘樂長風捲雨白
日來池瀑淙淙向人落
三峽長江動地迴
遙波轉汐送林隈
當牕劣崩翠可愛百尺芙蓉
天外開寒梅水竹連芳野
鷗

鴈鷺鷺滿沙墅豐草能為冬夏青飛雲不管晨昏度坐
來谷籟飄林樾清景令人爽毛骨為君去此謝浮名還
山却埽林塘月

題湖南清絕圖

宋
韓駒

故人來從天柱峰手提石廩與祝融兩山坡陀幾百里
安得置之行李中下有瀟湘水清瀉平沙側岸搖丹楓
漁舟已入浦澈宿客帆日暮猶爭風我方騎馬大梁下
怪此物象不與常時同故人謂我乃絹素粉精墨妙煩

良工都將湖南萬古愁與我頃刻開心胸詩成畫往默
惆悵老眼復厭京塵紅

洪武丁丑春題王叔明湖山清曉圖

明

莫士安

青山屏列水涯畔白雲繚繞山腰半分明曉色澄素秋
顛倒湖光接銀漢江霞滅盡海曠生巴雪消多沔冰泮
岌業巔崖高莫梯回合源泉淨堪盥天遠匡廬秋杳冥
雨足沅湘春汗漫濃於藍汁可染衣赭若童顛未加冠

盤谷繚通百折深巖嶺危撐半空斷澗橋蔭合踞新涼
渚閣香凝坐平旦短屐扶藜野興濃輕舸聚網波紋散
南灣農鄰猶閉關西崦人家未炊爨僧寺樓臺松滿林
漁屋軒窗柳遮岸陶令秫田誰為耕邵侯瓜地親將灌
種桃莫問武陵津采芝偶得商於伴書封鴈帛感蘇卿
鱸斫鱸絲羨張翰濯纓欲待滄浪清挽衣空歌白石爛
樹樹巖花嵐霧重葉葉汀蒲水風亂蛺蝶暖依芳草飛
鷓鴣晴入叢篁喚荇藻翻容避釣魚杉柎不借尋巢鷓

壁帙芸枯粉蠹生岫幌藤穿蒼鼠竄翠墮梧桐借翦圭
幕結絲蘿愛垂幔米家尚存書畫船吳綾不減錦繡段
人來西北淹壯遊地擁東南隔奇觀標靈顯秀環故居
汎影浮暉在吟案誰能高深故不競我為登臨每無憚
當時對景真髣髴遶次圍闌舊凝翫丹青物色眼停瞬
鐵石心腸顏為汗蹤跡頓忘今昔非記憶方驚歲年換
半生自笑不歸去兩足其如有羈絆泉石膏肓百慮增
塵土心胸一朝澣湖山如此慰相思天地茫然寄長歎

題王叔明湖山清曉圖

明
王世貞

誰捐吳綾寫蕭瑟乍看無乃王摩詰即非摩詰或思訓
敢謂黃鶴樵人筆黃鶴夜半不肯眠欲換凡翼求真筌
吸將三斛碧沆瀣吐作八尺青嬋娟空青濛碧猶未已
似有天雞喚山起零露枝枝瓔珞珠初陽處處蒲萄綺
問余展卷胡留連欲言不言心惘然市朝少進車馬急
方信此中殊有天

巨然山寺

金
任
詢

孤撐山作碧螺髻漫散水成蒼玉鱗野寺荒涼人不到
水光山影正橫陳

題巨然山寺圖

元虞集

禪林闕清景雲門作重關幽人不可求邈然在高山古
路何迢迢前塵接人寰雖有樓觀高飛泉望潺湲誰為
飛行身踐蹋紫翠間野渡具舟楫有待終日間空令垂
釣客薄暮聽鐘還

燕文貴秋山蕭寺圖

元鮑恂

蕭寺久寥落燕侯為發揚
山橫紅樹晚殿鎖碧雲涼
杖策情仍在乘舟意不忘
獨懷前代事撫景暗悲傷

燕文貴秋山蕭寺圖

元

陸廣

長風吹船過彭蠡縹緲雲巒轟天際
天柱峰迴玉筍遙金掌芙蓉半空起
汴宋先後多畫師回斡天機誰比擬
燕侯文貴世罕得點染清妍才擅美
斯圖拂拭雙眼明幽討直須論萬里
箭櫟絡石虧雲根鐵壁蒼崖澈澗沚
紺殿珠樓佛寺中丹臺玉室仙境裏
水塘沙際市橋邊

野店人家茅屋底令我憶舊遊心跡追冥搜華星耀丹壑綵仗凌玄洲安期羨門子招搖指蓬丘回視勾吳山培塿一土抔載復觀斯圖慷慨興歌謳

燕文貴秋山蕭寺圖

元

高遜志

野性樂山水塵居違素心蕭然困疲役胡能遂幽尋恒思愜所適勝槩恣登臨秋清景尤曠蒼翠列遙岑霜餘委蔓草孤秀愛雲林畸人寡諧俗結宇丹崖陰浮念不煩遣寂寞契沖襟况復過蕭寺禪誦有遺音簞瓢足自

老簪組知難任披圖憶所歷閱歲茲已深景物匪殊昔
但傷華髮侵何當脫塵躅歸休期自今

燕文貴秋山蕭寺圖

元
俞復

潯陽江上山如繡挾策追遊憶往年柿葉霜黃秋滿壑
芙蓉波冷月臨川釣舟箇箇來沙曲梵宇層層倚樹顛
白髮田園歸計晚斷腸西望夕陽邊

燕文貴秋山蕭寺圖

元
倪瓚

野棠花落過清明春事怱怱夢裏驚倚棹幽吟沙際路

半江煙雨暮潮生

題燕文貴秋山蕭寺圖

明黃守

迴崖列岫鬱相連，兜率樓臺際碧天。
飛鳥已還秋色裏，疎鐘猶在夕陽邊。
溪橋緩轡官人馬，野飯維稍客子船。
記得宦遊逢此景，披圖不覺思茫然。

方方壺松巖蕭寺圖

元鄧文原

雨過鷓鴣啼歇日，斜猿聲高湖上長。
煙漠漠山中古寺迢迢人立東，
皋清眺歸西浦寒潮。

方壺松巖蕭寺

元
吳鎮

方壺終日瘴煙霞寫得湖山事事嘉
湖上煙籠梵王宅
山深雲覆羽人家
詩翁佇立搜新句
穉子閒來埽落花
幾處歸帆何處客
一聲啼鳥夕陽斜

方方壺松巖蕭寺圖

并序

元
黃公望

方壺此卷高曠清遠可謂深入荆關之堂奧矣鄙句
何足以述之媿媿

浩渺滄江數千里
幾幅蒲帆挂秋水
曉風吹斷綠蘿煙

百疊青峰望中起
梵王宮闕倚雲開
七級浮屠倒影來
山人久已謝朝市
日踞江頭百尺臺
松篁叢雜多啼鳥
隔岸人家九彈小
此圖此景入天機
誰能髣髴方壺老

題香山寺畫卷

元王惲

送客當年過玉泉
醉中遊賞得奇觀
一泓湛碧浮僧鉢
幾葉秋黃打石闌
山色空濛金界濕
松聲清泛海波寒
吟鞭回首都門道
斜日歸時翠滿鞍

題秋林煙寺圖

元陳旅

秋氣滿林壑野樹集汀洲有客過山寺聽猿臥石樓

費景祥索題徐幼文寫蕭山古寺圖

明
張羽

山人手持酒一卮長跪向我求新詩自言此畫君所識
乃是河南使君之所為砮崖怒瀑形崛奇天門閣道相
因依中有臺殿橫天梯金繩碧瓦光參差使君當年作
此時祇是昂藏一布衣豪雄意氣今已極圖畫應知得
者稀右丞輞川不易致此公名位豈卑微請語世上悠

悠者人生貧賤安可欺

煙寺晚鐘圖

元
吳師道

半空孤塔擎飛杵四壁長煙漲白波
落木疎林秋色老
斷鐘殘磬暮樓多

煙寺晚鐘圖

明
謝士元

百八振砵訇遠送夕陽暝煙際聲未沉
歸僧在蘿逕

集句題山邨圖

二首

元
馬臻

先生高興似樵漁更有何人在此居
茅屋數間牕窈窕

睡時山雨溼圖書

萬疊青山但一川
一邨桑柘一邨煙
隔林髣髴聞機杼
猶記騎驢掠社錢

題江邨圖

元杜本

樹林蓊蔚水縈環
知是江南何處山
幾載幽并倦行役
按圖欲借屋三間

水邨圖

明鄧楠

向來寓意思卜居
佳處只今成畫圖
胸中本自渺江海

主人相浼寫汾湖

水邨圖

明 顧天祥

疎柳平蕪落鴈飛
斷橋斜日釣船歸
江天萬頃秋如畫
一笑人間醉墨非

水邨圖

明 沈周

魚莊蟹舍一叢叢
湖上成邨似畫中
互渚斷沙橋自貫
輕鷗遠水地俱空
船迷楊柳人依綠
燈隔蒹葭火映紅
全與吾家風致合
草堂曾有此愚翁

題董元溪岸圖

元 趙孟頫

石林何蒼蒼，油雲出其下。
山高蔽白日，陰晦復多雨。
窈窕溪谷中，邈回入洲渚。
冥冥猿狖居，漠漠鳬鴈聚。
幽居彼誰子，孰與玩芳樹。
因之一長謠，商聲振林莽。

錢舜舉溪岸圖

明 張羽

憶昔至元全盛日，天子詔下徵遺逸。
吳興八俊皆奇才，秀郎王孫稱第一。
一朝玉馬去朝周，諸子聲名總輝赫。
豈知錢郎節獨苦，老作畫師頭雪白。
江南沒骨傳者希，

錢也得法誇精奇晴牕點染弄顏色得錢沽酒不復疑
今人祇知重花鳥豈識此圖奪天巧玄雲抱石雷雨垂
蒼山夾水龍蛇遶岸側溪回共杳冥蒲稗深沉映魚鳥
漁舟乍隨遠煙散客子競渡澄江曉自云布置師北苑
只恐庸工未深了卷餘更有魏公題字擬鍾王差未老
鄭侯得之恐神授使我一見喜絕倒雙溪流水清何極
城外南山空黛色文章翰墨何代無二子儔能躡其迹
為君題詩三歎息於乎古人難再得

蒼崖遠渚圖

二首

元好問

深谷高林自一天紅塵無路近風煙兩椽茅屋半生了
况是清溪有釣船

竹帛功名一筆無殘年那復計榮枯青山未得攜家去
惆悵題詩是畫圖

題梅道人平林野水圖

元鄭洪

浣花谿頭車騎發鏡湖影裏畫圖開有客相尋草堂去
何人却櫂酒船迴是處山林有真隱如此風塵無好懷

青袍不似黃冠樂二老風流安在哉

水光林影圖

元
丁鶴年

知是平泉是輞川水光林影共悠然
薜蘿涼映紛紛月蘋藻清涵澹澹天
微颭翠旗龍天矯倒開金鏡鳳翩翾
此中真趣誰能辨吏隱雲間一散仙

為王希曾題啓南長蕩圖

明
吳寬

吳綾八尺餘遠勝好東絹坐移長蕩來
歛向眼中見按圖想舊遊巒嶺非生面
陽山踞獨尊虎阜奔而殿柔櫓

一搖搖船頭翠痕轉春山澹若空白雲故多變佳哉吳
中景獨許沈郎擅典客方壯年孰云宦途倦吾志每圖
南欲趁秋風便幽深付一筇此樂人勿羨

為楊簡齋題空濛圖

元馬臻

西湖天下奇回薄太古色春風散花柳元氣蕩空碧淡
然存天真豈為歌舞惑我家本住湖水邊筆牀茶竈依
漁船振衣一別五千里為君展卷心茫然欲問吾廬在
何處但見老木浮寒煙吾廬不可尋山川不可越人生

行止會有時長笑階前望明月

題陳直卿一碧萬頃

元
朱德潤

浩蕩具區尾蒼茫不斷流水光浮四霽雲氣接三州日
月雙丸吐江山萬古愁吟軒未能敞鄉思獨登樓

為馬仲禎題一灣煙水

明
僧麟洲

占得沙河水一灣此身能與狎鷗閒桃花斷岸無船到
楊柳衡門盡日關千里煙波歸老眼十年魂夢入鄉山
扁舟西塞山前路流水肥魚待雨還

次韻趙僉為趙宰畫野水多於地春山半是雲蓋

宰之尊公詩也

宋方岳

竹屋無人肯見過寒雲自傍釣船多老仙更在雲深處
奈此春山野水何

江流天地外山色有無中

明魏時敏

林亭閒寄傲極目浩無邊山斂雲藏樹江浮水接天征
鴻歸楚塞斜日下襄川留得山翁醉清風幾百年

題友雲水墨畫以唐人不雨山長潤無雲水自陰

為畫景遂次其韻題之

明陳顥

看畫晴牕裏蕭然淨俗心
鳥聲春寂寂嵐氣晝陰陰
門俯滄洲迴船移別浦深
令人想風致飛夢到雲林

御定歷代題畫詩類卷二十一

欽定四庫全書

御定歷代題畫詩類卷二十二目錄

山水類

題朱審寺壁山水畫

唐柳公權

同族弟金城尉叔卿燭照山水壁畫歌

唐李白

臺中寓直晨覽蕭侍御壁畫山水

唐羊士諤

奉和李右相書壁畫山水

唐源遜

觀于舍人壁畫山水

唐王季友

依韻和仲庶省壁畫山水

宋司馬光

次韻吳仲庶省中畫壁

宋王安石

依韻和原甫廳壁許道寧山水

宋梅堯臣

曹仁熙畫水壁

宋晁說之

毘陵太平院壁間畫山水

宋林景清

和元晦詠畫壁

宋張栻

觀劉氏山館壁間所畫四時景物各有深趣因為

六言一絕復以其句為題作五言四詠

宋朱子

壁間古畫精絕未聞有賞音者

宋朱子

人日遊西山寺觀謝章壁畫山水

金趙秉文

張吏部宅山水壁歌

元范梈

友人壁間寒山圖

元范梈

題額森特穆爾開府宅壁畫山水歌

元趙孟頫

題畫壁

元貢性之

題壁間畫

明于謙

觀古壁畫山水歌

明牟嘉叙

壁間雜畫

明李延興

題金山壁間畫

明陳鈞

題濟寧公館壁間山水

明李裕

定州畫壁水

明王世貞

畫學董生畫山水屏風

宋蘇轍

畫枕屏

宋蘇轍

張秀才枕屏

宋陳造

山水屏

宋曾鞏

山水卧屏 宋黃庶

題戲水墨山水屏 宋楊萬里

新作紙屏隆師為作山水 宋程俱

自畫山水留春堂大屏題其上 宋晁補之

題嚴州王秀才山水枕屏 宋陸游

徐道士水墨屏 宋白玉蟾四首

山水屏圖詩 元朱德潤

牀屏山水圖歌 明高啓

題畫屏

明陳煒

題山水障子

唐張祐

題王右丞山水障

唐張祐二首

劉相公中書江山畫障

唐岑參

題畫帳山水

唐皇甫冉

謝重緣舊山水障子

唐齊己

硯水墨障子

唐李洞

觀山水障子

唐伍喬

郭熙山水障子

宋劉克莊

題俞景山畫山水障

明錢宰

題山水障子

明張適

畫障次韻

明俞暉

畫山水障

明周用

曹民部藏何太守山水障歌

明祝允明

題陳道復谿山障子

明王寵

題山水障

明李汛

題山水畫障

明杭濟

題董生春山障子

明王穉登

御定歷代題畫詩類卷二十二目錄

欽定四庫全書

御定歷代題畫詩類卷二十二

山水類

題朱審寺壁山水畫

唐
柳公權

朱審偏能貌夕嵐
洞邊深墨寫秋潭
與君一顧西牆畫
從此看山不向南

同族弟金城尉叔卿燭照山水壁畫歌

唐
李白

高堂粉壁圖蓬瀛
燭前一見滄洲清
洪波洶湧山崢嶸
皎若丹丘隔海望
赤城光中乍喜嵐
氣滅謂逢山陰晴
後雪迴溪碧流寂
無喧又如秦人月
下窺桃源了然不
覺清心魂祇將疊
嶂鳴秋猿與君對
此歡未歇放歌行
吟達明發却顧海
客揚雲帆便欲因
之向溟渤

臺中寓直晨覽蕭侍御壁畫山水

唐

羊士諤

蟲思庭莎白露天
微風吹竹曉淒然
今來始悟朝回客
暗寫歸心向石泉

奉和李右相書壁畫山水

唐 孫 逖

廟堂多暇日山水契中情欲寫高深趣還因繪藻成
九江臨戶牖三峽繞檐楹花柳窮年發煙雲逐意生能令
萬里近不覺四時行氣染荀香馥光含樂鏡清詠歌齊
出處圖畫表冲盈自保千年遇何論八載榮

李公詩云
八載忝司

存

觀于舍人壁畫山水

唐 王季友

野人宿在人家少朝見此山謂山曉半壁仍棲嶺上雲

開簾欲放湖中鳥，獨坐長松是阿誰。
再三招手起來遲。
于公大笑向余說，小弟丹青能爾為。

依韻和仲庶省壁畫山水

宋司馬光

畫工執筆已心遊，稍稍蘅皋引杜洲。
堆案煩文猶倦暑，滿軒新意忽驚秋。
天生賢者非無謂，官遇明時未易休。
正恐怒飛朝暮事，丹青難得久淹留。

次韻吳仲庶省中畫壁

宋王安石

畫史雖非顧虎頭，還能滿壁畫滄洲。
九衢京洛風沙地，

一片江湖草樹秋
行數鯨魚賓共樂
臥看鷗鳥吏方休
知君定有扁舟意
却為丹青肯少留

依韻和原甫廳壁許道寧山水云是富彥國作判

官時畫

宋
梅堯臣

山情水思半軒間
試問來居有底閒
唯有才高方暇佚
無論歲月自能攀

曹仁熙畫水壁

宋
晁說之

夫子在川上悠然歎
所逝見逝不見水身
與水不二天

維及地軸去矣不可制日月徒勞勞出入丈尺地莫言
此身微九圍待經濟或指波濤觀姑在蹄涔內後人不
及門有口安足議妙得蒙莊周動與呂梁會肇公識前
波不共後波繫龐公橋柱流奔湍是誰事熟誇觀濤者
八月吳儂戲瞪目不敢瞬曉轉蛟鼉噬多謝曹仁熙筆
端落妙意欲採甍社珠於此觀粲翠

毘陵太平院壁間畫山水熟視之有飛動勢殆仙

筆也因題

宋
林景清

山風不動雲四寂萬頃波濤生素壁三峽夜怒搖星河
九溟晝沸卷霹靂誰將江海一筆吞華陽入硯玄波翻
靈鼇東轉坤軸動驚浪出沒蛟與鼇毫端分寸千萬里
人心之險亦如此老僧閱世如閱畫面壁凝然悟玄理
嗟余老作汗漫游寒光飛動六月秋乃知瞿唐在平陸
安得竹葉吹成舟

和元晦詠畫壁

宋張栻

松杉夾路自清陰溪水有源誰復尋忽見畫圖開四壁

悠然端亦慰余心

觀劉氏山館壁間所畫四時景物各有深趣因為
六言一絕復以其句為題作五言四詠

宋
朱子

絕壑雲浮冉冉層巒日隱重重釋子巖中晏坐行人雪
裏迷蹤

頭上山洩雲脚下雲迷樹不知春淺深但見雲來去
夕陽在西峰晚谷背南嶺煩鬱未渠央佇茲清夜景

清秋氣蕭瑟遙夜水崩奔自了巖中趣無人可共論
悲風號萬竅密雪變千林匹馬關山路誰知客子心

壁間古畫精絕未聞有賞音者

宋朱子

老木樛枝入太陰蒼崖寒水斷追尋千年粉壁塵埃底
應識良工獨苦心

人日遊西山寺觀謝章壁畫山水

金趙秉文

蕭寺荒堂三五間謝章滿壁畫江山天涯霜雪少春意
一日攜酒開心顏飢禽穿窗啄官粟歲久剝牆樵指禿

山僧送客不開門
寒雲夜夜飛來宿

張吏部宅山水壁歌

元
范梈

高堂秉燭見翠微
巖厓突兀當兩扉
庭前繫馬霧露集
老木倒挂藤蘿衣
問誰妙手能至此
筆墨簡古世所稀
天官主人為我言
翰林供奉精天機
憶我尋山客南粵
地暖四時皆芳菲
眼中得此了不易
便覺宇宙揚清暉
旅人獨行歌采薇
滄洲茅屋何年歸
安得峰頭置雙鶴
相逐蓬萊頂上飛

友人壁間寒山圖

元
范梈

行盡天涯不見秋
君家庭院冷飈飈
太平欲選風霜吏
畫史當居第一流

題額森特穆爾開府宅壁畫山水歌

元
趙孟頫

大山翠律摩青天
小山平遠通雲煙
商侯胸中有丘壑
信手落筆分清妍
閭風玄圃元不遠
燦爛金碧流潺湲
參差澗谷樓觀起
縈紆石路朱橋連
松風颼颼響虛閣

棋聲剝啄來羣仙漁歌樵唱渺何許輪巾羽扇清溪邊
高情自有泉石趣涼意不受塵埃纏世間書畫亦豈少
誰能真賞如公賢華堂風日不到處絕勝繡幙空高懸
舉觴酌酒為公壽眼明對此三千年

題畫壁

元貢性之

何處江山似此佳看君圖畫欲移家沙邊洲渚潮渾沒
雲裏樓臺樹半遮叢桂漫歌招隱賦種桃誰識避秦花
晚風吹送歸舟急一片征颿帶落霞

題壁間畫

明
于謙

看山如看畫聽水如聽琴
水流碧溪轉山高白雲深
俯仰天地間萬物本無心
松風颯然來為我滌煩襟

觀古壁畫山水歌

明
牟嘉叙

危樓百尺凌空起古壁丹青畫山水
淨埽浮埃據榻觀筆跡何人乃能爾
想當盤礴時巧思妙入神胸中羅萬
象寫出皆天真迴峰疊嶂開嶙峋
白波浩蕩渺無垠仙人宮闕擁出
碧雲裏宛如三山隔水無通津
松間白鶴

呼不下却思整翮凌蒼旻超然風景異人世四時花木
相鮮新溪林冥密碧草合又如桃花源有路通秦人蒼茫
遠勢尤莫測渤澥崑崙看咫尺一葉漁舟歸未歸洞庭
秋淨湘煙碧野橋沙岸曲徑通高樹下有長髯翁恍如
著我圖畫中手攜雲鏡倚青松萬籟不起千山空仰天
一笑看飛鴻

壁間雜畫

明
李延興

山中之人氣奕奕愛畫雲山與水石遠山近山恣一揮

頃刻生綃數千尺今代只數高尚書妙處不減米家筆
後之善畫者為誰青山白雲久蕭瑟忽驚座上煙靄生
漠漠平林翠如織平生夢想不可到乃在君家雪色壁
花發窮林破曉紅水合長天蕩晴碧蘆邊雁影落迴汀
沙上漁蓑曬斜日白髮蒼顏四老人棋罷松間坐爭席
筍皮笠子大如織歸去不愁山雨濕爐經九轉鍊丹成
杖挂百錢沽酒喫眼看此景不可親况復憧憧事塵役
會須結屋山之阿更求好田水之側野人生理自有餘

耕歸牛角懸書帙茅檐夜火促寒機古甸秋風收晚粟
安車若便下丘樊為勸先生不可出

題金山壁間畫

明
陳鈞

空翠忽入戶飛來何處峰人家多傍樹僧寺不聞鐘流
水衝橋急閒雲出岫慵何當撫琴坐願學臥遊宗

題濟寧公館壁間山水

東董憲
副國器

明
李裕

良工繪畫應擅名故向粉壁施丹青青巒碧嶂粲如綺
溪橋流水空泠泠煙樹蒼茫隱臺閣白晝寒風起巖壑

兩峰嵯峨插九霄飛瀑一簾半空落古松偃蹇石崔嵬
小舟蕩漾江水隈春雲如波埽不去野花含笑年年開
我本當時雲路客到處山川多閱歷遠觀恍若太華之
三峰氣勢崢嶸薄星日近觀又似東岱之天門懸崖雙
扇凌絕壁平生逸興獨超然靜坐對之紛慮釋美人高
趣儻在茲乞歸同買謝公屐

定州畫壁水二堵妙絕天下望之若真水起伏潏
洄有浩漾萬頃之勢州志謂為吳道子畫非也

寺成在道子後百餘年余歌以暢厥美仍為志

解嘲

明
王世貞

柏林寺中千株柏蟄月寒虬怒生翼誰為吸盡西江水
一吐阿蘭雙素壁永夜旋愁牛漢翻中堂陡見龍門關
更疑滄海浴日初不斷瀟湘帶天色鴈王睥睨飢欲動
娑竭蜿蜒避無策驚毫欲捲阿耨枯醉瀟橫拖鷺頭碧
怪無蘭漿為穿進縱有并刀剪不得寒聲颯颯生清瀾
令我三日欲臥觀借問畫者誰畫筆勁似秋鷹搏無乃

孫知微定非楊契丹試披圖經讀謂是吳道子此寺此
壁天福始開元之人人已鬼只今何限丹青師好手吳
生那得之君不見唐朝葉道士攝魄為寫松陽碑

畫學董生畫山水屏風

宋蘇轍

承平日事足鴻都無不有策牘試篆隸丹青寫飛走紛
然四方集狐兔萃林藪何人知有益長嘯呼鷹狗奔逃
走城邑驚顧念糊口素屏開白雲稱我茅檐陋濡毫願
揮灑峰巒映巖竇巨石連地軸飛布瀉天漏紫山一徑

通過水微橋構山家煙火然遠寺晨鐘叩僧從何方來
行速午齋後有客呼渡船隔水惟病叟听然發一笑此
處定真否人生初偶然與此誰天壽厄窮妄自憐一醉
輒日富客至亦茫然邀我沽斗酒

畫枕屏

宋蘇轍

繩牀竹簟曲屏風野水遙山霧雨濛長有灘頭釣魚叟
伴人間臥寂寥中

張秀才枕屏

宋陳造

寒風慘澹森木古羣鴉無人自翔舞重山積水幾里所
稍見孤舟渺煙雨意吞洞庭卓天姥短屏數幅渠能許
何時去作湖山主還喚詩翁未著語

山水屏

宋 曾鞏

吳縑落寒機舒卷光亂目秋刀剪新屏尺寸隨折曲搜
羅得珍匠徙倚思先屬經營頃刻內千里在一幅定眎
乃漸通紀一作悲數難迫促山亂若無窮負抱頗重復高
稜最當中桀大勢尤獨回環衆峰接趨向若奔伏矜雄

跨九州爭險挂星宿深疑雪霜積暗覺煙霧觸泉源出
青冥漲潦兩厓束歷遠始紆徐派別輸衆谷輕舟漾其
間沿汴無緩速微尋得修逕側起破蒼麓達到無限極
窮升犯雲族遊子定何之顧盼停馬足盤石長自閒空
源偶誰築塵氛見荒林物色存古俗粲粲弄幽花蒼蒼
蔭嘉木遺牛上巖巔驚麕出槎腹鮮明極萬狀指似纔
一粟雖從人力為頗類陰怪續深堂得欹眠高枕生遠
矚餘光耀衾幃清意凝慢褥愚訶世幸略慵臥嗜尤酷

因能助佳夢肯顧躋杲旭將相有時材溪巖真我欲儒
林恥未博俗弄思自贖婚嫁累苟輕耕釣吾已卜圖屏
持自慰寤寐心思逐

山水臥屏

宋
黃庶

林泉生長厭應難更寫方屏幾曲間仕宦東西苦無定
此心長似宿家山

題戲水墨山水屏

宋
楊萬里

權郎大似半邊蠅摘蕙為船折草撐今夜不知何處泊

浪頭正與嶺頭平

新作紙屏隆師為作山水筆墨略到而遠意有餘
戲題此句末句蓋取所謂柴門鳥雀噪游子千
里至也

宋程俱

急雨初收山吐雲清溪曲曲抱煙邨拋書午枕無人喚
歸夢真疑鵲噪門

自畫山水留春堂大屏題其上

宋晁補之

胸中正可吞雲夢醖裏何妨對聖賢有意清秋

一作扶筇入

衡霍為君

一作毛錐

無盡寫江天

題嚴州王秀才山水枕屏

宋陸游

我行天下路幾何
三巴小益山最多
翠崖青嶂高嵯峨
紅棧如帶縈巖阿
下有駭浪千盤渦
一跌性命委蛟鼉
日馳三百一鳥騾
雪壓披氈泥滿鞵
驛亭沃酒醉臉酡
長笛腰鼓雜巴歌
大散關上方橫戈
豈料世變如翻波
東歸輕舟下江沱
回首歲月悲蹉跎
壯君落筆寫岷嶠
意匠自到非身過
偉哉千仞天相摩
谷裏人家藏綠蘿

使我恍然越關河熟視粉墨頻摩挲

徐道士水墨屏

四首

宋白玉蟾

鴈側風前字煙凝雨後情不知誰氏子持釣立江城
人遠看來短山遙淡欲無水邊漁舍密天際客帆孤
亂山草斜出危岡竹倒懸人家春樹裏山色夕陽邊
霜月沈青嶂汀鷗臥白沙曉風刪竹葉秋霧補山了

山水屏圖詩

元

朱德潤

丈夫無奇才雖顯不足名高山之秀麗兀立培塿形況

乃畫圖間兩奪造化精中堂素壁本虛靜誰令揮灑研
丹青女媧五色不補天神功鞭石來蒼旻驅山奔海入
紉素扶輿之氣青熒熒赤城霞彩千峰明洞庭湘浦雲
英英風帆晝捲瀟湘雨黃葦堆灘插漁畧獨木莊前野
水流夕陽川上散橋渡大峰倚天接天門又如特立太
華尊羣山趨俯不敢動山前星辰手可捫我欲託身山
上巔丹梯百尺何由緣畫興欲來別有趣顛毫醉墨飄
如仙仙成却服九還丹兩腋清風飛上天

牀屏山水圖歌

明高啓

畫師知余愛青山久墮塵網無由還故將列岫寫屏幃
使我臥起於其間從此長如宿清境枕上分明見峰嶺
爐煙曉入帳中飛擁被驚和白雲冷丹崖碧樹層層開
江雨遠逐孤帆來就中樓閣是何處髣髴神女巫陽臺
楚山修竹瀟湘水似有清猿忽啼起江南千里夢遊歸
半牀落月高堂裏

題畫屏

明陳煒

雪漫江天萬木中一閒茅屋覆詩翁何人醉醒梅花月
蹋遍寒山路幾重

題山水障子

唐張祐

一見秋山色方憐畫手稀波濤連壁動雲物下簷飛嶺
樹冬猶發江帆暮不歸端然是漁叟相向日依依

題王右丞山水障

二首

唐張祐

精華在筆端咫尺匠心難日月中堂見江湖滿座看夜
凝嵐氣濕秋浸碧光寒料得昔人意平生詩思殘

右丞今已沒遺畫世間稀咫尺江湖盡尋常鴻鴈飛山
光全在掌雲氣欲生衣以此常為玩平生滄海機

劉相公中書江山畫障

唐
岑參

相府徵墨妙揮毫天地窮始知丹青筆能奪造化功瀟
湘在簾間廬壑橫座中忽疑鳳凰池暗與江海通粉白
湖上雲黛青天際峰晝日恒見月孤帆如有風巖花不
飛落澗草無春冬擔錫香爐緇釣魚笠澤翁如何平津
意尚想塵外蹤富貴心獨輕山林興彌濃喧幽趣頗異

出處事不同請君為蒼生未可追赤松

題畫帳山水

唐皇甫冉

桂水饒楓杉荆南足煙雨猶疑黛色中復是雒陽岵

謝重緣舊山水障子

唐齊己

敢望重緣飾微茫洞壑春坐看終未是歸臥始應真已
覺中心朽猶憐四面新不因公子鑒零落幾成塵

硯水墨障子

唐李洞

若非神助筆硯水恐藏龍研盡一寸墨埽成千仞峰
僻

根堆亂石牀罅種枯松
岳麓穿因鼠湘江綻為蜚挂衣
嵐氣濕夢枕浪頭春只為少顏色
時人著意慵

觀山水障子

唐
伍喬

功績精妍世少倫
圖時應倍用心神
不知草木承何異
但見江山長帶春
雲勢似離巖底石
浪花如動岸邊蘋
更疑獨泛漁舟者
便是其中舊隱人

郭熙山水障子

宋
劉克莊

高為峰崑下清江
極目森秀涵滄浪
始知著色未造極

一似醜女施鉛黃驚泉駭石聚幽怪巨楠穹柏蟠老蒼
鹿門寺華子固是邪非邪遠莫詳疑聞鐘聲起晦靄似
有帆影來微茫陌窮渡絕雪滿坂驢鞍釣笠分毫芒失
曦亭午試展玩坐覺煙雨生縑緗古來絕藝必名士俗
史辟易安敢當大年脂粉米老狂先朝僅數燕侍郎吾
聞汾陽子貴購父畫一筆不許他人藏矮屏短軸已可
寶況此四幅垂華堂嗚呼主人謹護守神雷鬼電或取
將

題俞景山畫山水障

明 錢 宰

老夫索居江上樓廿年不出懷舊游扣門下樓出迎客
但見絕壑風颼颼岱宗日觀山上頭日出未出蒼煙浮
嵩高插天太華碧峨眉青城翠欲流匡廬老泉挂白石
蒼梧水落湘江秋懸崖倚天萬山立翔鸞舞鳳蟠蒼蚪
幽岑遠樹互出沒白雲不散松風收松根老樵列四五
招我共入青林幽平生遊歷走不遍千里萬里窮遐搜
如何一日墮我前空翠雜沓來雙眸舉頭問客何因入

此境迺是手持圖畫來滄洲
俞君作畫時雅有山林癖
朝登望秦山萬壑千巖盡
橫臆暮上香爐峰海色秋清
上遥碧歸來放筆作董元筆
底丹青浩無跡海桑一別
三千年山月江風耿相憶
仰觀巖上泉俯看松下石
故人不見空畫圖十幅雲煙
捲還客

題山水障子

為蕭溪耕者賦

明張適

蕭溪先生樂山者結屋臨溪
頗幽雅開軒見水不見山
却向圖中看揮灑高齋素壁
懸清風彷彿坐我林崖下

欽定四庫全書

御定歷代題畫詩
卷二十二

羣峰奔馳勢如馬綠樹人家面平野層閣忽從天際來
飛泉遠自峰頭瀉半山雲氣千峰白滿谷霞生萬巖赭
野橋日落行人稀幽徑花開知者寡蕭溪閒居晝多暇
坐對此圖看不捨平生况復能食力春作鉏犁躬自把
短策朝耕隴上雲長檠夜落書邊炮有時歸來面盟鷗
鯨吸春醅知幾竿登高或著謝傅屐帶酒何妨遠公社
臨池每解學來禽對客猶知論裏鮓醉中邀我賦長篇
老我才疎不堪寫

畫障次韻

明 俞 暉

老人自是逃名者白髮蕭然綠薜衫
盡日江亭誰作伴相看沙鳥與風帆

畫山水障

明 周 用

屋下得萬里黯澹費神力自君眼光遠
豈復在丹墨長風落微波孤月中夜直
赤縣復可置何得愛四壁此路達京華
江湖猶旅食我有懷中書為附南飛翼

曹民部藏何太守山水障歌

明 祝允明

蒼煙橫晚江江樹不可辨
遠山號國眉近山翼不變
誰將元氣夜半翻凌亂
少陵好東絹幽人絕流一葦航
應恨可人不相見千邨萬落路不通
恐有閉門忘世翁
孔明漸老安石臥誰為蒼生起
臥龍須臾雲樹開蒼茫始識九疑分
瀟湘良工出自何水部妙思已落陳思王
陳思王今葛謝袖中脩脩有造化
蕭齋晏坐對圖畫時發雲霖潤天下

題陳道復谿山障子

明
王寵

天台秀出鴈蕩峰削壁飛泉如白龍跳珠散落四時雨
偃蓋反走千尋松陰崖複洞絕地脈明湖玉鏡開天容
山深或聞虎兇鬪日落但有漁樵逢陳郎不減阮嗣宗
雲霓蜺曲蟠其胸黃公壚頭枕麴卧蹶起埽出金芙蓉
高山流水有深意却思荷蕢還山農

題山水障

明
李 汎

王孫妙思奪化工儘收丘壑藏心胸醉來傾倒玉壺墨
灑向鷺溪作秋色濕雲初起山翠新回風不斷波粼粼

石梁煙外轉蕭瑟薜蘿掩映幽人宅逍遙二老晚風餘
沿溪散步飄輕裾翩然與鶴立松下髣髴當年避秦者
人間舊路杳無蹤雲深不遣漁郎通君不見秦家鹿走
楚蛇斷滄海桑田幾興歎惟有仙源歲月賒碧桃未落
秦時花

題山水畫障

明杭濟

斷岸橫舟山日陰人家散居楓樹林江煙萬里破孤暝
江波倒影天沈沈短渚長沙渺無極木葉吟風動蕭瑟

鷺鳥歷亂飛盡空坐見遙岑送秋碧


題董生春山障子

贈朱金吾

明

王穉登

董生留我子雲亭畫盡春山酒未醒
贈與侯家金屋裏美人筵上關眉青



欽定四庫全書

名媛詩歸
卷二十二

御定歷代題畫詩類卷二十二